

Lubidá na Kas di Sosiegu

Nuebe luna largu bo mama a soportá e inkonbinensianan físiko, kulminando ku e dolornan intensivo di parto, i a ponébo riba e mundu aki. Ta bo mayornan ku a lidia ku bo, siñábo papia, i seka bo lagrimanan fo'i tempu bo tabata chikitu. Ora bo tabata malu, ta nan ku a sakrifiká nan soño pa kuida i konsolábo. Nan a traha duru, sin e fasilidatnan di nos era moderno, i ku sodó di nan frenta a gana e pan di kada dia pa nan famia.

Awor nan kurpanan ta kansá i kisas asta manká òf deformá pa e slanan di bida. Kisas nan bista òf oído ta faya nan. E mannan ku antes a tenébo asina duru awor ta tembla. Kisas e mente ta skèrpi, ma e abilidatnan físiko a laga nan na kaya. E kara tan konosí awor ta kubrí ku ploi i koroná ku kabei blanku, un rekordatorio konstante ku pa nan solo ta baha i nochi ta serka. Nan tin mester di yudansa den nan biehes, bo yudansa. Awor ta bo turno pa yuda nan!

Ma mas i mas den nos era moderno famianan ta bandona nan ansianonan. Konsiderando nan un inkombiniensia ku ta eksigí demasiado di nos tempu presioso, nos ta manda nan Kas di Sosiegu. E grandinan ta stroba nos di sali manera nos sa tin kustumber di hasi. Of kisas e pèrsona di edat atvansá ta mirá komo un peso finansiero. Nos ta asina okupá ku nos sistema di bida materialista i egoista ku nos no tin tempu pa esnan ku a sakrifika tantu pa nos.

Kisas den nos ignoransia nos ta pensa ku Kas di Sosiegu ta nèt e lugar pa nos grandinan. Sigur nan lo ta kontentu ku tantu hende di nan era rònt di nan ku ken nan por komuniká riba un mesun nivel. Tin aktividatnan spesial pa nan. Kas di Sosiegu tambe tin profeshonalnan ku eksperensia den kuido di ansianonan. Ki un situashon ideal, nos ta pensa.

Ma nos grandinan por mira nan estadia einan no komo un sosiegu, ma mas bien komo un sentensia. Un sentensia di bida largu...debí ku nan lo keda ei te dia nan ta sali den un kaha di morto. Nan por mir'é komo un sentensia di isolashon. Ningun ansiano na Kas di Sosiegu lo bisa ku e ta haña muchu bishita. Algun ta bandoná i lubidá pa nan famianan—manera e dicho hulandes ta bisa "fo'i bista, fo'i kurason." Tur dia nan ta karga e speransa ku awe por ta e dia ku un yu òf nietu huntu ku e bisañetu beibi lo pasa kumindá. Nan ta biba ku antisipashon di mira nan sernan kerí. Ma ta tristu ku hopi di nan ta bai drumi kada anochi desepshoná. O si, nos ta kòrda nan na tempu di Pasku. Tur hende ta kòrda pa bishitá e grandinan e tempu ei. Ma kiko di e otro 364 dia di aña?

Dios ta insistí ku e famianan tin responsabilidat pa kuida nan grandinan. "Ma si algun biuda tin yu òf nietu, laga eseynan muestra nan deboshon na nan mes famia promé i laga nan rekompensá e welanan, pasobra esei ta bon i agradabel dilanti Dios. Ma si algun hende no ta perkurá pa su famia i prinsipalmente pa esnan di su kas, esei a nenga fe i ta pió ku un ku no tin fe" (1 Timoteo 5:4,8).

Gradisí Dios ku Kas di Sosiegu ta eksistí. Kiko lo nos hasi si no tabatin hende ku a prepará pa kuida nos ansianonan? Tin ora ta impusibel pa e famianan kuida nan grandinan. Kisas no tin lugar den kas. Kisas bo a hasi bo bèst pa sòru pa bo mayornan den nan biehes, ma pasobra nan estado físiko òf mental a degenerá, no ta pusibel pa sigui duna e kuido ku nan tin mester i ta meresé. Bo a hañábo obligá di hasi un desishon pa interná nan na Kas di Sosiegu. No sinti kulpabel pa esei.

Ma di otro banda, pa hiba nos grandinan na Kas di Sosiegu, bandoná nan, lubidá nan, i laga nan vegetá ei (meskos ku bo ta deshasí di un aparato dor di hib'é lèntfil) ta un tendensia preokupante. Maske kisas nos tin e fasilidat i abilidat, nos ta muchu egoista pa hasi e sakrifisionan ku nos grandinan a hasi pa nos. Mas materialista nos komunitat boneriano ta bira, mas e tendensia aki lo krese. Nos no por ignorá e echu ku un di e dies mandamentunan ta resoná: "Onra bo tata i bo mama" (Exodo 20:12). E mandamentu aki no ta stipulá pa un límite di tempu. E ta na vigor asta ora bo mayornan tin nobenta aña. Sigur un manera pa onra nan ta pa hasi pa nan loke nan a hasi pa bo...kuida nan.